

法華經合論

一

C40

4514

(12)

C40-4514

了翁上座請大藏及百
家書置之於別鉢雲山
我微笑瑤苑庠府中永
為學者不敢詩出院內
當山二世鐵十機



B 64853



妙法蓮華經合論卷第一

經 姚秦三藏法師鳩摩羅什 譯

論 宋寶覺圓明禪師惠洪 造

論附 宋丞相無盡居士張商英 撰

妙法蓮華經

論曰心法之微妙分別語言所不能形容然則終不可見之歟曰唯以方便設象以達其意使學者自求而得之爲可見也此三世如來法施之式十方菩薩悟入之因夫衆生難見者自心習見者蓮華指其習見之象示其難見之妙故以經名妙法蓮華其寂滅靈知之體廣大光明之用隨其所知

之量寓於七卷之文二十八品之義應機而答稱性而談無詳略無麤妙皆象也蓮之方開已有子子中已有蕊三際同時也以之觀自心則知古今圓於一念在華嚴經則曰智入三世而無來往蓮之子既已分布又會屬焉以之觀根境則知能所分而不斷在般若經則曰無二無二分無別無斷故由是論之則古今圓於一念者三世之蓮也能所分而不斷者十方之蓮也至於佛出廣長舌相放無數光聲歎彈指聲震三千大千手摩微塵菩薩之頂久已滅度多寶佛塔忽然現前三變淨土名十方分身佛畢集微塵菩薩隨佛語譯從地涌

出而云在處有說法華經寶塔皆現當見我與多是意也豈特見於此經華嚴入法界品毗目仙人執善財童子手卽時善財自見其身往十佛刹微塵數世界中到十佛刹微塵數諸佛所見彼佛刹及其衆會諸佛相好種種莊嚴乃至或經百千億不可說佛刹微塵數劫乃至時彼仙人放善財童子手卽自見其身還在本處善財自見其身到十佛刹微塵數佛所者十方不隔也或經百千億不可說佛刹微塵數劫者三世不移也學者於此能見不傳之妙則名報佛恩經如織經經常而緯變所言爲經而已緯焉以成則經所不能言也

序品第

如是我聞一時佛住王舍城耑闍崛山中

論曰梁西域僧真諦曰依微細律阿難當升座結集法藏之時其身如佛具足相好大衆仰瞻生三種疑疑從涅槃起更爲衆生說法疑他方佛來此說法疑阿難成佛爲衆說法爲除此三疑故阿難稱如是我聞一時於是三疑頓釋住王舍城耑闍崛山中者說此經處也摩竭國王於其地作舍而城之名王舍城耑闍崛此言靈鷲山形如之其山在王舍城南

與大比丘衆萬二千人俱皆是阿羅漢諸漏已盡無復煩惱逮得已利盡諸有結心得自在

論曰比丘此言淨乞食言破煩惱言能持戒言能怖魔阿羅漢此言賊破言應供言不生皆以一名而含多義於此稱比丘而曰大者以一切衆中之奇英天人所宗敬能勝九十六種議論故諸漏則欲漏色漏無色漏由有漏故有煩惱夫能修無漏法證無漏智則其神無隙而煩惱不能入矣結使流則受扼縛蓋見纏等皆煩惱也以其固結難盡故謂之結若無三漏之因則無三有之果三有三界之別名也聲聞未逮菩薩利他之功逮得已利

而已難盡者盡則心得解脫而自在矣無復煩惱則賊破逮得已利則應供盡諸有漏則不生也此特槩叙萬二千衆之所證而其魁壘秀出者又名標而次于下文

其名曰阿若憍陳如摩訶迦葉優樓頻螺迦葉伽耶迦葉那提迦葉舍利弗大目犍連摩訶迦旃延阿菟樓駄劫賓那憍梵波提離婆多畢陵伽婆蹉薄拘羅摩訶拘絺羅難陀孫陀羅難陀富樓那彌多羅尼子須菩提阿難羅睺羅如是衆所知識大阿羅漢等復有學無學二千人摩訶波闍波提比丘尼與眷屬六千人俱羅睺羅母耶輸陀羅比丘尼亦與眷屬俱

論曰阿若多此言解義其名也憍陳如此言火器
其姓也世事火天因以爲姓摩訶迦葉此言大龜
其姓也其先有龜國之瑞而於諸迦葉中德臘俱
高故以大別之優樓頻螺此言木瓜林伽耶此言
城那提此言河此三迦葉兄弟也而其所居之處
曰林曰城曰河也舍利弗此言身子其母身儀美
好故世猶以子名之大目犍連此言萊菔其姓也
萊菔其先所嗜故摩訶迦旃延此言文飾其姓也
阿菟樓駄此言無貧亦言如意劫賓那此言房宿
父母禱此星而生因以爲名憍梵波提此言牛相
離婆多此言室星畢陵伽婆蹉此言餘習有慢習

者薄拘羅此言善容摩訶拘絺羅此言大昧難隨
此言喜孫陀羅難隨此言艷喜富樓那此言滿其
父也彌多羅尼此言慈其母也從父母得名者也
須菩提此言空生生時其家倉廩器皿皆空故阿
難此言慶喜羅睺羅此言覆障能食月謂我法如
月此兒世世能覆障我不卽出家世世障我我世
世能捨也夫言有學則漏未盡而在學地者無學
則是阿羅漢同在此位者以有潛行密用非衆所
知識者則又別叙之摩訶波闍波提此言大愛道
尼此言女佛之從母而乳已者耶輸陀羅此言華
色如上所叙名氏譯有訛略如阿若憍陳如具云

阿若多憍陳那那之爲言男也佛成道時最初悟
解此姓多女故稱男以別之又譯曰已知亦解義
之訛也如離婆多具云頡麗伐多又譯假和合以
其義較室星則大相遼智度論曰此比丘緣宿空
亭見兩鬼爭屍悟身假合則室星之譯可疑也如
迦旃延具云摩訶迦多衍那此言大剪剃種男蓋
先世工刀籥因以爲姓而曰文飾則爲太略耳如
舍利弗具云舍利弗怛囉亦云鷲子亦云珠皆以
其母目媚好故方其娠於母母之辯慧已勝其舅
拘絺羅拘絺羅曰此兒生必易我發憤爲學無剪
爪之暇者是也

菩薩摩訶薩八萬人皆於阿耨多羅三藐三菩提不
退轉皆得陀羅尼樂說辯才轉不退轉法輪供養無
量百千諸佛於諸佛所植衆德本當爲諸佛之所稱
歎以慈修身善入佛慧通達大智到於彼岸名稱普
聞無量世界能度無數百千衆生其名曰文殊師利
菩薩觀世音菩薩得大勢菩薩常精進菩薩不休息
菩薩寶掌菩薩藥王菩薩勇施菩薩寶月菩薩月光
菩薩滿月菩薩大力菩薩無量力菩薩越三界菩薩
跋陀婆羅菩薩彌勒菩薩寶積菩薩眞師菩薩如是
等菩薩摩訶薩八萬人俱

論曰阿耨多羅三藐三菩提此言無上正徧正覺

陀羅尼此言總持於無上正徧正覺則曰皆不退
轉於總持乃至轉不退輪則曰皆得夫所謂皆得
不退轉者如金出鑛不復重鑛如木成灰不復重
木至於供養諸佛則曰植衆德本植之爲言壅培
之謂也善入佛慧則曰以慈修身修之爲言增益
之謂也壅培增益則十地菩薩長養大慈大悲之
法此諸佛稱歎之辭也而無著菩薩論分爲十種
不退轉義是大不然諸佛旣稱歎之矣則當示以
智悲及六波羅蜜故曰通達大智到於彼岸蓋言
大智則兼悲言彼岸則兼六波羅蜜金剛般若經
曰所有一切衆生之類乃至我皆令入無餘涅槃

者悲也如是滅度無量無數無邊衆生實無衆生
得滅度者智也菩薩於法應無所住行於布施施
名檀度檀度通於六度天親菩薩釋曰檀義攝於
六資生無畏法此中一二三名爲修行住以是知
菩薩欲以方便度諸衆生越生死流到涅槃岸必
先悲智欲具足萬行莊嚴智地必先六波羅蜜故
以十八大菩薩證成前義文殊師利智也觀世音
悲也以知見力震動魔宮故名得大勢念念不與
世間心合故名常精進虛空可殞我無疲厭故名
不休息以此三位證成精進也見乏受用以資生
施故名寶掌見病緣苦以無畏施故名藥王見流

轉苦以法施故名勇施以此三位證成檀度也嚴
淨毗尼如月初現故名寶月隨順無欲修淨戒度
如月之光全是月體故名月光諸戒定慧及姪怒
癡俱是梵行如月臨照不擇穢潔故名滿月以此
三位證成戒度也離沉掉故獲變化定故名大力
三摩地中光嚴住持故名無量力以此二位證成
禪度也已盡世間心故名越三界善守護心城故
名跋陀婆羅跋陀婆羅此言善守以此二位證成
忍度也初登滿覺猶名智相故名彌勒莊嚴智相
今不住故故名寶積合是二法以濟羣生故名導
師以此三位證成智度也然金剛般若經之叙六

度必自檀度以及戒忍此獨不然何也曰經示一
佛乘欲凡夫實證故實證必藉精進之力所以六
度之首弁以精進以致其意焉

爾時釋提桓因與其眷屬二萬天子俱復有名月天
子普香天子寶光天子四大天王與其眷屬萬天子
俱自在天子大自在天子與其眷屬三萬天子俱娑
婆世界主梵天王尸棄大梵光明大梵等與其眷屬
萬二千天子俱

論曰華嚴經曰三千大千世界初始成時先成色
界諸天宮殿次成人及餘衆生諸所住處四天王
天鄰於日月者居須彌山之半腹出海四萬二千

由旬日月自其宮前繞旋以照四天之下自其上
以至忉利天尚四萬二千由旬蓋帝釋所居之處
山之頂也其四隅八天共三十二而帝釋主之經
言釋提桓因此言能作謂能作忉利天主故卽華
嚴經所謂帝釋也名月普香寶光三天子者帝釋
之臣如世卿相等四大天王者帝釋之衛臣如世
武將等自在自在二天子者六欲之樂變化天
及他化自在天也此叙欲界來衆至於色界則瑜
伽論曰有十八處謂梵衆天梵前蓋天大梵天此
三由空中上品重修初淨慮故經言娑婆世界主
梵天王尸棄大梵者是此勝流娑婆此言堪忍梵

此言離欲尸棄此言頂髻此叙色界初禪來衆瑜
伽論又曰少光無量光極淨光此三由空中上品
重修第二淨慮故經言光明大梵等是此勝流此
叙二禪來衆特不叙兜率炎摩諸天何也曰智度
論曰欲界四王及忉利天所依止地近佛故佛生
時苦行時得道時轉法輪時常來供佛餘四天宮
殿在虛空五欲之妙染著深故不來耳兜率雖利
根自有補處說法故亦不來梵天雖遠以離欲故
愛法情深請佛轉法輪故來以智度所論觀此經
知五欲之爲害也甚矣諸天值佛出世且爲之障
而不聞法矧佛滅度之後六趣之異生乎

有八龍王難陀龍王跋難陀龍王娑伽羅龍王和脩
吉龍王德叉迦龍王阿那婆達多龍王摩那斯龍王
優鉢羅龍王等各與若干百千眷屬俱

論曰八龍各因其所寓得名龍豈累於名哉或以
德或以威或以海或以池難陀此言歡喜跋難陀
此言善歡喜二龍兄弟也以靈感故風雨時若人
心喜悅因以爲名娑伽羅此言鹹海和脩吉此言
多頭德叉迦此言現毒阿那婆達多此言無熱惱
第八地菩薩爲之摩那斯此言慈心將雨則雲陰
七日候衆生事辦乃雨優鉢羅此言黛色蓮華如
慈心歡喜則寓於德多頭現毒則寓於威無熱惱

黛色蓮華則寓於池娑伽羅則寓於海然龍無耳
何能聽法哉曰人其龍形則能之華嚴經曰文殊
師利化入人間覺城東大塔廟處轉說此經號普
照法界修多羅於大海中有無量百千億龍而來
其所聞法已深厭龍趣發大菩提心得不退轉言
無量百千億龍而來其所足矣必曰大塔廟處轉
說此經何也曰塔廟寂滅則說無所說諸龍無耳
則聞無所聞故也

有四緊那羅王法緊那羅王妙法緊那羅王大法緊
那羅王持法緊那羅王各與若干百千眷屬俱有四
乾闥婆王樂乾闥婆王樂音乾闥婆王美乾闥婆王

笑音乾闥婆王各與若干百千眷屬俱

論曰有世間之樂有出世間之樂出世間之樂法樂也四緊那羅是也世間之樂四乾闥婆是也緊那羅此言人非人又名疑人以其人而角見者疑其爲人也耶非人也耶天帝法樂之神倚聲奏四諦之法故名法奏十二因緣之法故名妙法奏六波羅蜜之法故名持法乾闥婆此言尋香謂其以香爲食樂者竿木等伎樂音者鼓節絃管美者艷姬妙舞美音者皓齒清唱舊說絲不如竹竹不如肉以其漸近自然四者俱以王稱而執樂解藝則有男女之異鳩摩羅什曰緊那羅王天帝俗樂神

寧有奏四諦十二因緣六波羅蜜而名俗哉什雖博聞然不能折之以理亦多誤也

有四阿脩羅王婆稚阿脩羅王佉羅騫馱阿脩羅王毗摩質多羅阿脩羅王羅睺阿脩羅王各與若干百千眷屬俱有四迦樓羅王大威德迦樓羅王大身迦樓羅王大滿迦樓羅王如意迦樓羅王各與若干百千眷屬俱韋提希子阿闍世王與若干百千眷屬俱各禮佛足退坐一面

論曰阿脩羅此言無酒常採花醞海以爲酒魚龍業力故味不能變於是大怒誓不復飲婆稚此名被縛爲天帝以五物繫其頸佉羅騫馱此名廣肩

膊廣又勇健便於涌海毗摩質多羅此言淨心能
波海出聲帝釋之姻家羅睺此言障持以手障日
月者也十地經曰有五類一極弱者住人間山林
西方山大深窟有非天之宮又譯阿素洛此言非
天也二妙高山北大海之下二萬一千由旬有羅
睺之宮三又二萬一千由旬有勇健之宮四又下
二萬一千由旬有華鬘之宮華鬘此言綺畫以文
其身五又下二萬一千由旬有毗摩質多羅之宮
凡八萬四千深於須彌矣迦樓羅此言金翅鳥翅
作金色張之直三百三十六萬里觀海之龍命將
盡者以翅劈海取而食之以威勝等類鷲諸龍故

名大威德以身大於等類故名大身以所食龍足
已之意故名大滿頸有如意之珠故名如意韋提
希此言思惟卽阿闍世王母也阿闍世此言不生
怨卽摩竭國王以母名子故曰韋提希子

爾時世尊四衆圍繞供養恭敬尊重讚歎爲諸菩薩
說大乘經名無量義教菩薩法佛所護念佛說此經
已結跏趺坐入於無量義處三昧身心不動

論曰經文起伏頓挫爲兩段而其辭互見但是一
意何則既言說無量義以教菩薩則義以無量言
之豈於衆集之頃便曰說此經已乎又言入於無
量義處三昧義無實相而曰有處乎茲可疑也華

嚴論曰佛在摩竭提國阿蘭若法菩提場中始成正覺於普光明殿入剎那際三昧明以法界身為定體無三世性故從兜率天下降神及入涅槃七十九年住世轉一切法輪捨不出剎那際以此三昧圓通始終非三世古今故以論較此經七十九年住世轉一切法輪捨不出剎那際則聚集之頃尚為廣長時分以法界身為定體無三世性故則無量義處非多多無數之量也學者當深觀之是時天雨曼陀羅華摩訶曼陀羅華曼殊沙華摩訶曼殊沙華而散佛上及諸大眾普佛世界六種震動亦時會中比丘比丘尼優婆塞優婆夷天龍夜叉乾

闍婆阿脩羅迦樓羅緊那羅摩睺羅伽人非人及諸小王轉輪聖王是諸大眾得未曾有歡喜合掌一心觀佛

論曰摩訶此言大曼陀羅此言適意曼殊沙此言柔軟謂天華柔軟適悅人之意耳東涌西沒南涌北沒中涌邊沒謂地動震驚使達法相之虛誑耳佛與大眾儼然寂住而天地為之變動則知一切法即真故無情無情之異肇論曰玄道在乎妙悟妙悟以即真即真則物已同觀物已同觀則彼已莫二是以天地與我同根萬物與我一體經將廣明其意於此微見其端而已優婆塞此言近事男

優婆夷此言近事女夜叉此言輕捷摩睺羅伽此言大蟒腹行之類也仁王經曰十善菩薩發大心長別三界苦輪海中下品善粟散王上品十善鐵輪王習種銅輪二天下銀輪三天下性種道種堅德轉輪王七寶金光四天下經言小王轉輪聖王等者不欲略諸小王耳

爾時佛放眉間白毫相光照東方萬八千世界靡不周徧下至阿鼻地獄上至阿迦尼吒天於此世界盡見彼土六趣衆生又見彼土現在諸佛及聞諸佛所說經法并見彼諸比丘比丘尼優婆塞優婆夷諸修行得道者復見諸菩薩摩訶薩種種因緣種種信解種種相貌行菩薩道復見諸佛般涅槃者復見諸佛般涅槃後以佛舍利起七寶塔

論曰以東方萬八千世界下至阿鼻地獄阿鼻此言無間上至阿迦尼吒天阿迦尼吒此言礙究竟無不周徧則此世界亦廣大矣乃現於一毫相光之中乎六趣異生自其緣業之善惡至其受報之好醜比丘菩薩行道以至於作佛諸佛說法涅槃以至於起塔則此歲時亦長久矣乃見於一念之頃乎經之意明如日星而文字之師爲之疏釋方毛數名相瑕求義理雜然而興雲升烟聚雷馳電走使學者四方易位昏昕莫辨爲可歎也眉間之

光如指井以示渴者告以水之所在也反愛其欄
楯之巧甃砌之工又以夸於是豈能止渴也哉
華嚴論曰一剎那際三世互參乃至無量劫海依
今而住不移時也一切聖賢知此而得道情想妄
見三世者不知智爲先導則能知之由是以觀則
十方器界皆顛倒所持三世根身皆情想所見所
謂無上妙覺徧諸十方出生如來與一切法同體
者固自若也佛以方便光照一方使知十方悉亦
如是如嘗一嚮知鼎味不必盡鼎而食也經但舉
東方則可以知餘諸方此示器界也舉器界則可
以知根身欲學者互見而自明之耳舊疏曰西域

以東爲上經被佛性大乘根機不被餘乘根性故
如日之出先照高原佛故先度上根失經之旨甚
矣

爾時彌勒菩薩作是念今者世尊現神變相以何因
緣而有此瑞今佛世尊入于三昧是不可思議現希
有事當以問誰誰能答者復作此念是文殊師利法
王之子已曾親近供養過去無量諸佛必應見此希
有之相我今當問尔時比丘比丘尼優婆塞優婆夷
及諸天龍鬼神等咸作此念是佛光明神通之相今
當問誰爾時彌勒菩薩欲自决疑又觀四衆比丘比
丘尼優婆塞優婆夷及諸天龍鬼神等衆會之心而

問文殊師利言以何因緣而有此瑞神通之相放大光明照于東方萬八千土悉見彼佛國界莊嚴於是彌勒菩薩欲重宣此義以偈問曰

論曰文殊師利歡喜藏摩尼寶積佛過去之佛也彌勒菩薩次補釋迦牟尼佛未來之佛也文殊釋迦彌勒會于耆闍崛山釋迦之放光現瑞彌勒之請問決疑文殊之稱性而說過去未來現在同時互參之象經如前文則是頓見淨穢之土等觀劫頃之時至於偈辭則加詳焉然彌勒之深悲欲眾生之猛省如漢范增之愛項羽增勸羽殺沛公因鴻門坐中增數目項羽舉所佩玉玦以示之者三

項羽默然不應彌勒之偈叙所見聞掩抑重複千餘言時時泄佛之密機如范增之數舉玉玦也臨文當自見之

文殊師利導師何故眉間白毫大光普照雨鬘陀羅鬘殊沙華栴檀香風悅可衆心以是因緣地皆嚴淨而此世界六種震動時四部衆咸皆歡喜身意快然得未曾有眉間光明照于東方萬八千土皆如金色從阿鼻獄上至有頂諸世界中六道衆生生死所趣善惡業緣受報好醜於此悉見又睹諸佛聖主師子演說經典微妙第一其聲清淨出柔軟音教諸菩薩無數億萬梵音深妙令人樂聞各於世界講說正法

種種因緣以無量喻照明佛法開悟衆生若人遭苦
厭老病死爲說涅槃盡諸苦際若人有福曾供養佛
志求勝法爲說緣覺若有佛子修種種行求無上慧
爲說淨道文殊師利我住於此見聞若斯及千億事
如是衆多今當略說

論曰彌勒言我於一毫光中所見之事蓋有千億
今爲偈句但其略說者如此如華嚴經曰善財童
子見彌勒樓閣周回四壁一一步內一切衆寶以
爲莊嚴一一寶中皆現彌勒曩劫修行菩薩道時
或施頭目或施手足唇舌牙齒耳鼻血肉皮膚骨
髓乃至爪髮如是一切悉皆能捨妻妾男女城邑

聚落國土王位隨其所須盡皆施與牢獄者令得
出離被繫縛者使其解脫有病疾者爲其救療入
邪徑者示其正道或爲船師令渡大海或爲馬王
救諸惡難或爲大仙善說妙論或爲輪王勸修十
善或爲醫王善療衆病或孝順父母或親近善友
或作聲聞或作緣覺或作菩薩或作如來教化調
伏一切衆生乃至見彌勒菩薩百千萬億那由他
阿僧祇劫修行諸度一切色像善財於樓閣衆寶
莊嚴一一物中悉見如是及餘無量不思議自在
境界則眉間一毫光中現萬八千土猶爲隨其所
知之量示導之也其言如是衆多今當略說者舉

玉瑛之一者也

我見彼土恒沙菩薩種種因緣而求佛道或有行施金銀珊瑚真珠摩尼磈磈瑪瑙金剛諸珠奴婢車乘寶飾輦輿歡喜布施迴向佛道願得是乘三界第一諸佛所歎或有菩薩駟馬寶車欄楯華蓋軒飾布施復見菩薩身肉手足及妻子施求無上道又見菩薩頭目身體欣樂施與求佛智慧文殊師利我見諸王往詣佛所問無上道便捨樂土宮殿臣妾剃除鬚髮而被法服或見菩薩而作比丘獨處閑靜樂誦經典又見菩薩勇猛精進入於深山思惟佛道又見離欲常處空閑深修禪定得五神通又見菩薩安禪合掌

以千萬偈讚諸法王復見菩薩智深志固能問諸佛聞悉受持又見佛子定慧具足以無量喻爲衆講法欣樂說法化諸菩薩破魔兵衆而擊法鼓又見菩薩寂然宴默天龍恭敬不以爲喜又見菩薩處林放光濟地獄苦今入佛道又見佛子未嘗睡眠經行林中勤求佛道又見具戒威儀無缺淨如寶珠以求佛道又見佛子住忍辱力增上憍人惡罵捶打皆悉能忍以求佛道又見菩薩離諸戲笑及癡眷屬親近智者一心除亂攝念山林億千萬歲以求佛道

論曰前言見聞若斯及千億事者叙其廣也此言攝念山林億千萬歲者叙其久也意謂一毫之小

不應容受如是衆廣之事一念之促不應經歷如是長久之時其辭贍博而旨微見又如舉玉珎者二也神仙傳漢神爵元年東吳金華山世傳多地行仙有木容新於山中見兩黃窀碁於松下木容隅坐而窺之黃窀碁自若也良久欠伸欲歸俄失黃窀所在而碁殘之局在地未收舉手中斧視之柄已爛壞大驚疾馳出山而陵谷已改國邑非舊問路人今爲何時有對者曰宋元嘉十三年也於是木容太息因隱于山中又西域記曰中印度有隱者能黃金瓦礫更求輕舉之術久乃得之法用烈士抱劔立壇之側屏息不語一夕則自誦秘咒

然後仙去其後得一烈士傾意禮之將行法謂曰君能爲我一夕不語乎對曰公見禮之厚死且不辭一夕不語豈難事哉於是使依法爲之將旦烈士者絕叫火自空中而下隱士蒼黃引入水避之讓曰誠君勿語何妄叫呼耶對曰自受命後夢舊主人責以不語遂爲所殺託生南印度大婆羅門家追惟厚恩終以默然忽生一子其妻曰汝今不語卽殺此兒舉刃擬之因急止之不覺語發耳碁未終局木容坐易四朝夜未達旦烈士夢更兩世覺夢雖殊不出一念以其所可信驗其所難信譬如蜜味不見中邊也

或見菩薩肴膳飲食百種湯藥施佛及僧名衣上服
價直千萬或無價衣施佛及僧千萬億種種栴檀寶舍
衆妙卧具施佛及僧清淨園林華果茂盛流泉浴池
施佛及僧如是等施種種微妙歡喜無厭求無上道
或有菩薩說寂滅法種種教詔無數衆生或見菩薩
觀諸法性無有二相猶如虛空又見佛子心無所著
以此妙慧求無上道文殊師利又有菩薩佛滅度後
供養舍利又有佛子造諸塔廟無數恒沙嚴飾國界
寶塔高妙五千由旬縱廣正等二千由旬一一塔廟
各千幢旛珠交露幔寶鈴和鳴諸天龍神人及非人
香華技樂常以供養文殊師利諸佛子等爲供舍利

嚴飾塔廟國界自然殊特妙好如天樹王其華開敷
佛放一光我及衆會見此國界種種殊妙諸佛神力
智慧希有放一淨光照無量國我等見此得未曾有
佛子文殊願決衆疑四衆欣仰瞻仁及我世尊何故
放斯光明佛子時答決疑令喜何所饒益演斯光明
佛坐道場所得妙法爲欲說此爲當授記示諸佛土
衆寶嚴淨及見諸佛此非小緣文殊當知四衆龍神
瞻察仁者爲說何等

論曰偈辭之宏妙比類之富贍如開武庫衆寶縱
橫然至於其終則兩偈之中疊稱放光如曰佛放
一光又曰放一淨光何渠渠以光爲言耶蓋其欲

學者寤之之切如舉玉玦示之者二也而學者之終不寤如項羽之默然何則計著語言文字之深也楞嚴經曰不應攝受隨說計著真實者離文字故大慧如爲愚夫以指指物愚夫觀指不得實義如是愚夫隨言說指攝受計著至竟不捨不能得離言說指第一實義

爾時文殊師利語彌勒菩薩摩訶薩及諸大士善男子等如我惟忖今佛世尊欲說大法雨大法雨吹大法螺擊大法鼓演大法義諸善男子我於過去諸佛曾見此瑞放斯光已卽說大法是故當知今佛現光亦復如是欲令衆生咸得聞知一切世間難信之法

故現斯瑞諸善男子如過去無量無邊不可思議阿僧祇劫今時有佛號日月燈明如來應供正徧知行足善逝世間解無上士調御丈夫天人師佛世尊論曰華嚴經之佛號盧舍那此言光明徧照圓覺經之會號神通大光明藏夫言光明徧照則不可以處求言神通大光明藏則不可以時求無處無時則是剎那際諸佛三昧故此經兼言無處無時阿僧祇此言無數劫此言時分經言過去無量無邊不可思議阿僧祇劫者思慮不及之地無時之時也日以照晝月以照夜燈以照幽光明徧照之地無處之處也然不直言如華嚴圓覺而必言無

數時劫及日月燈者經唯以象達意故也非特此而已所言欲說大法而及兩者徧普之象螺者橫亘十方之象鼓者豎窮三際之象蓋吹螺必橫擊鼓必豎也佛號日月燈者十號具足佛自如實道來故名如來所作福德應受一切供養故名應供諸法不動不壞爲正不爲知一法二法爲悉知一切法爲徧故名正徧知福慧兩足故名明行足如車兩輪所往隨意故名善逝知世間知世間盡知世間盡道故名世間解於種種師爲上故名無上士調御丈夫以三乘法教化衆生故名天人師一切世間煩惱睡能自覺覺人故名佛住最上處故

名世尊

演說正法初善中善後善其義深遠其語巧妙純一無雜具足清白梵行之相

論曰修多羅有不壞假名說實相義者初中後善三法是也然此三句必相連以達其辭以初善爲假立以中善爲實義以後善亦爲假立故金剛般若經曰般若波羅蜜卽非般若波羅蜜是名般若波羅蜜無著菩薩釋曰如露形神所持之杵兩頭闊其中狹故闊者虛狹者實故所言般若波羅蜜者假名也卽非般若波羅蜜者實相也是名般若波羅蜜者亦假名也瑜伽論曰一初善謂聽聞時

生歡喜故二中善謂修行時無有艱苦遠離二邊
依中道行故三後善謂極究竟離諸垢故及一切
究竟離欲爲後邊故法性離垢故修行究竟得果
離垢故所言離垢者假立之名是染汙故舊疏曰
聲聞法名初善辟支佛法名中善大乘法名後善
誤矣

爲求聲聞者說應四諦法度生老病死究竟涅槃爲
求辟支佛者說應十二因緣法爲諸菩薩說應六波
羅蜜令得阿耨多羅三藐三菩提成一切種智

論曰此叙日月燈明佛昔出現于世時亦未欲便
示一佛乘故對機方便爲說三乘我今得道尋念

前古法施之式亦當遵奉而爲開演也長者之念
其子焄蒿悽愴若或見之幸其來歸望見大喜使
人急呼使者牽之其子舉身自撲稱怨大叫我不
相犯何爲見捉常不輕菩薩見人則故往禮拜讚
歎曰我不輕於汝等汝等皆當作佛而屢遭以瓦
石杖棒打擲趕趁曰我不用汝虛妄受記夫長者
之心愛其子常不輕菩薩之愛其衆可謂至矣不
可以有加矣而所以致其自撲稱怨與夫趕趁打
擲者誘化之方告報之語大徑廷耳以是知三乘
說法者三世如來不刊之式也

次復有佛亦名日月燈明次復有佛亦名日月燈明

如二萬佛皆同一字號日月燈明又同一姓氏頗羅墮弥勒當知初佛後佛皆同一字名日月燈明十號具足所可說法初中後善

論曰初佛自眉間放光而照東方者以根身六情皆動眉獨靜故器界十方皆靜東獨動故光發於靜中以及動處則知根身器界雖分能所而無情無情之異也於此叙根身故以佛言之佛號日月燈明而又重言之曰次復有佛亦名日月燈明次復有佛亦名日月燈明何也曰欲示根身既具則必連三世至於詳悉則言二萬佛皆同一字又同一姓氏頗羅墮頗羅墮此言利根般若經曰一方

千佛則十方萬佛此經示光明徧照十方故言萬佛初佛後佛是以二萬非特名同也而又字同非特字同也而又姓同姓同者其宗同也字同者其義同也名同者其實同也三者同則十號具足說法以初中後善不得不同也然佛於器界則但示東方之光而已至於根身則徧示一切處之明以是知經之意使學者互見本一光明非二法故於器界舉東方則十方自具舉所緣則能緣亦自具故於根身則詳分三世而伴倡名字皆非苟然也其最後佛未出家時有八王子一名有意二名善意三名無量意四名寶意五名增意六名除疑意七名

響意八名法意是八王子威德自在各領四天下是諸王子聞父出家得阿耨多羅三藐三菩提悉捨王位亦隨出家發大乘意常修梵行皆爲法師已於千萬佛所植諸善本

論曰前文旣叙日月燈明佛名同字同姓同者三世之佛也而特言其最後佛有八王子則前之二佛無容有不同者矣經言八王子各領四天下者何也曰本識執識分別事識及眼耳鼻舌身之五識爲八種皆依地水火風四大軀命而住八王子者八識也四天下者四大也圓覺經曰四緣假合妄有六根六根四大中外合成妄有緣氣於中積

聚似有緣相假名爲心此心本識最先所依止處也執識唯自內緣而不外執介於八六之間故身卽八識相分也於此叙衆生依處故經言佛未出家時也旣已成佛號日月燈明則其光明照十方界矣然亦必以身土爲依圓覺經又曰身心寂滅平等本際圓滿十方不二隨順於不二境現諸淨土淨土卽身土也所謂身土者卽轉八識四大之相而爲之非別有也故經言聞其父王出家得阿耨多羅三藐三菩提悉捨王位亦隨出家也問曰八王之子名何以分之曰本識微而難見二乘凡夫以爲無瑜伽論以八種義證其有一依止執受

相二最初生起相三有明了性相四有種子性相
五業用差別相六身受差別相七處無心定相八
命終時分相以是義知有本識八王子一名有意
是也緣本識有執識以執著爲體與四惑相應性
有覆無記至阿羅漢位乃滅與涉玄途則順理生
善二名善意是也此則第八本識第七執識也至
於六識五識則維摩經曰所見色與盲等所聞聲
與聾等所嗅香與風等所食味不分別受諸觸如
智證知諸法如幻相無自性無他性本自不然今
則不滅起信論曰若有所見則有不見之相若無
所見卽是徧照法界義故以是知所見色與盲等

者眼識體相如此故三名無量意首楞嚴經曰金
剛王寶覺者空法也以不動爲義風體不動以緣
故動如其本動則寧有止時以是知曰所嗅香與
風等者鼻識體相如此故四名寶意也智度論曰
二乘出無漏道時六情隨俗分別取諸法相故不
盡心力諸佛及大菩薩智慧無量無邊常在禪定
於世間出世間無所分別智慧增長以是知所食
味不分別者舌識體相如此故五名增意也華嚴
經曰應以智證明白自心夫自心旣明則疑情盡
矣以是知受諸觸如智證者觸識體相如此故六
名除疑意也智度論曰若耳根聞耳根無覺知故

不應聞若耳識聞耳識一念故不能分別不應聞
以是知所聞聲與響等者耳識體相如此故七名
響意也起信論曰凡所分別卽分別自心心不見
心無相可得分別而無相以是知本自不然今則
不滅者分別事識體相如此故入名法意也又問
曰然則皆以意稱何也曰意者末那染汙執識之
別名內緣本識外染六識而五識起時必與之俱
故揜謂之意古釋曰如一幻士化而爲七智者見
之知其化也而愚人謂真有七則過矣

是時日月燈明佛說大乘經名無量義教菩薩法佛
所護念說是經已卽於大眾中結加趺坐入於無量

義處三昧身心不動是時天雨曇羅華摩訶曇羅
羅華曇殊沙華摩訶曇殊沙華而散佛上及諸大眾
普佛世界六種震動爾時會中比丘比丘尼優婆塞
優婆夷天龍夜叉乾闥婆阿脩羅迦樓羅緊那羅摩
睺羅伽人非人及諸小王轉輪聖王等是諸大眾得
未曾有歡喜合掌一心觀佛爾時如來放眉間白毫
相光照東方萬八千佛土靡不周徧如今所見是諸
佛土彌勒當知今時會中有二十億菩薩樂欲聽法
是諸菩薩見此光明普照佛土得未曾有欲知此光
所爲因緣

論曰經以光明隱顯互見以示十方三世無不徧

周以動靜更用相參以示根身器界無不融攝於一念之頃見廣大之境界於五蘊之軀證清淨之身上古佛樣式昭然在前而二十億之衆亦欲知光之所自也諦觀者闍崛山今日一會如印印泥弗差毫髮如晉陶侃少嘗夢生八翼飛而上天見天門九重已登其八唯一門不得入闍者以杖擊之因墜地折其左翼及寤左腋猶痛既老都督八州據上流握強兵潛有窺窬之志每思折翼之祥自抑而止方偃夢時卽是自抑之日中間年歲亦與此時一同元無先後以驗文殊師利所叙日月燈明佛說無量義時不異世尊者闍崛山之會也

然豈特放光現瑞之同出定說法亦同也豈特出定說法之同入滅授記亦同也經之文勢具全但辭略耳

時有菩薩名曰妙光有八百弟子是時日月燈明佛從三昧起因妙光菩薩說大乘經名妙法蓮華教菩薩法佛所護念六十小劫不起于座時會聽者亦坐一處六十小劫身心不動聽佛所說謂如食頃是時衆中無有一人若身若心而生懈倦日月燈明佛於六十小劫說是經已卽於梵魔沙門婆羅門及天人阿脩羅衆中而宣此言如來於今日中夜當入無餘涅槃時有菩薩名曰德藏日月燈明佛卽授其記告

諸比丘是德藏菩薩次當作佛號曰淨身多陀阿伽
度阿羅訶三藐三佛陀佛授記已便於中夜入無餘
涅槃

論曰此段經放光入定說法授記至入涅槃雖辭
略而莫不同獨於毫相之光所現境界菩薩行道
經歷長久之意本具故經特曰六十小劫不起于
座時會聽者亦坐一處六十小劫身心不動聽佛
說法謂如食頃蓋欲足前義耳華嚴論曰其為廣
也以虛空而為量其為小也也極微而無跡十方
無卷匪虧於小相之中纖塵也舒含十方而非礙
一毫相中盡見廣大之境者 塵不舒含十方而

無礙也一食之頃已經六十小劫者十方無卷匪
虧於小相之中也瑜伽論曰或增減為一劫謂飢
饑疫病刀兵或有二十劫為一劫謂梵衆天或有
四十劫為一劫謂梵輔天或有六十劫為一劫謂
大梵天或有八十劫為一劫謂火災少光天乃至
不可數為一阿僧祇大劫雖分大小延促皆不出
一刹那也經言日月燈明佛從三昧起因妙光菩
薩說大乘經名妙法蓮華則與今佛已出定說法
同言中夜入無餘涅槃則與今佛將入涅槃同言
次當作佛號淨身多陀阿伽度阿羅訶三藐三佛
陀則與今佛授諸弟子記莈同也多陀阿伽度此

言如來阿羅訶此言應供三藐三佛隨此言正徧
覺十號之三也或全舉十或略舉三以此段文意
同而辭略故十號亦略也

佛滅度後妙光菩薩持妙法蓮華經滿八十小劫爲
人演說日月燈明佛八子皆師妙光妙光教化令其
堅固阿耨多羅三藐三菩提是諸王子供養無量百
千萬億佛已皆成佛道其最後成佛者名曰燄燈八
百弟子中有一人號曰求名貪著利養雖復讀誦衆
經而不通利多所忘失故號求名是人亦以種諸善
根因緣故得值無量百千萬億諸佛供養恭敬尊重
讚歎彌勒當知今時妙光菩薩豈異人乎我身是也

求名菩薩汝身是也今見此瑞與本無異是故惟忖
今日如來當說大乘經名妙法蓮華教菩薩法佛所
護念

論曰經稱八王子而皆以意爲名者象八種識俱
爲末那所汙染雖隨父出家以象轉而爲智未見
所以轉依之意將發此意先稱日月燈明佛已入
無餘涅槃以起後文所言智者有四種一曰大圓
鏡智二曰平等性智三曰妙觀察智四曰成所作
智經言妙光菩薩持妙法蓮華經者轉汙染意識
爲平等性智也此意在諸識位得汙染名今已成
智則没汙染名成平等光故稱妙光經言八子皆

師妙光妙光教化令其堅固乃至最後成佛名曰
熒燈者轉本識爲大圓鏡智也此智在諸識位得
執持名入第七地方稱異熟至於佛地乃爲智故
言最後成佛名曰熒燈也經言八百弟子中有一
人號曰求名乃至余時妙光菩薩豈異人乎我身
是也者轉第六分別事識爲妙觀察智則文殊師
利也又言求名菩薩汝身是也者轉五識爲成所
作智也問曰轉依之旨可得聞乎曰妙觀察智平
等性智俱爲意識因其功用之精粗遂分汙染分
別之異今轉分別爲妙觀察轉汙染爲平等性則
合而爲一矣故文殊師利自言我前身爲妙光也

五識卽本識相分相分蓋三苦所成之趣也六根
皆有功德而全半不齊身具八百功德故經言八
百弟子然觸之一法味著深故號曰求名唯其味
著深故便細滑喜軟美故言貪著利養又觸以合
方知性鈍無記故言雖復讀誦衆經而不通利多
所忘失也然亦必至果位方轉與本識同故經言
弥勒爲求名菩薩後身彌勒最後成佛故也八王
子及求名菩薩必言供養百千萬億諸佛者自凡
夫以至成佛必依善知識爲勸發之友以是知善
知識者是成佛最大因緣故譬如乳中有酪酪非
自然而成須醇以作而發之

爾時文殊師利於大衆中欲重宣此義而說偈言
我念過去世無量無數劫有佛人中尊號日月燈明
世尊演說法度無量衆生無數億菩薩令入佛智慧
佛未出家時所生八王子見大聖出家亦隨修梵行
時佛說大乘經名無量義於諸大衆中而爲廣分別
佛說此經已卽於法座上加趺坐三昧名無量義處
天雨曼陀華天鼓自然鳴諸天龍鬼神供養人中尊
一切諸佛土卽時大震動佛放眉間光現諸希有事
此光照東方萬八千佛土示一切衆生生死業報處
有見諸佛土以衆寶莊嚴琉璃玻瓈色斯由佛光照
及見諸天人龍神夜叉衆乾闥緊那羅各供養其佛

又見諸如來自然成佛道身色如金山端嚴甚微妙
如淨琉璃中內現真金像

論曰又見諸如來自然成佛道者經意佛道之妙
有不假修證而成者如首楞嚴經曰何藉劬勞肯
綮修證是也譯者潤色不工乃曰自然成佛道佛
道非自然而成自然而成者魔外所計耳夫不假
功力修證而成無上正等正覺之意難以語人也
語人則必驚疑不信佛知其如此故於圓覺經更
三菩薩之問乃盡其辭初告文殊師利則曰未斷
無明方成佛道次告普眼則曰始知衆生本來成
佛後告弥勒則曰一切衆生皆證圓覺初則顯言

有無明可斷次則遮無無明而曰本來成佛至於其卒乃曰皆證也皆證之旨如此其難知幸而知之文字之師反罪譯者而易之曰證知衆生具有圓覺甚矣三乘學者之難寤也昧一切衆生皆證之旨而爲自然及譯者得之而講師又更易之以循其私不可以不辨也

世尊在大衆敷演深法義一一諸佛土聲聞衆無數因佛光所照悉見彼大衆或有諸比丘在於山林中精進持淨戒猶如護明珠又見諸菩薩行施忍辱等其數如恒沙斯由佛光照又見諸菩薩深入諸禪定身心寂不動以求無上道又見諸菩薩知法寂滅相

各於其國土說法求佛道爾時四部衆見日月燈佛現大神通力其心皆歡喜各自相問是事何因緣論曰經稱二十億菩薩而偈言四部衆經稱欲知此光所爲因緣而偈言各自相問經稱如今所見是諸佛土而偈言衆生業趣諸佛淨土種種莊嚴種種修證者欲詳略互見耳偈叙六波羅蜜故言精進持淨戒行施忍辱等深入諸禪定知法寂滅相然亦先言精進經欲學者精進每於要會必致其意焉晉僧曇翼以持律稱住江寧長沙寺修精進行欲求佛舍利置寶瓶于齋几日夕拜之忽光夜出瓶中五色一室如晝翼加精進更求瑞像

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9
日夕向十方拜之曰像滿虛空願早感應太元十
九年二月八日光發城北白馬寺寺僧見像不能
舉翼後至曰像爲我至卽舉之泠然而起有旁行
字曰某年月阿育王造翼壽八十而化於像前魏
僧道進者嘗詣曇摩懺受菩薩戒懺曰當洗心自
悔七日乃來旣詣懺懺忽怒進默念曰此夙障也
加精進三年夢中見釋迦像爲授戒同夕十餘僧
皆夢如進所見又詣懺懺大驚曰善哉已獲戒矣
曇翼道進之明驗精進之力也

天人所奉尊適從三昧起讚妙光菩薩汝爲世間眼
一切所歸信能奉持法藏如我所說法唯汝能證知

世尊旣讚歎令妙光歡喜說是法華經滿六十小劫
不起於此座所說上妙法是妙光法師悉皆能受持
佛說是法華令衆歡喜已尋卽於是日告於天人衆
諸法實相義已爲汝等說我今於中夜當入於涅槃
汝一心精進當離於放逸諸佛甚難值億劫時一遇
世尊諸子等聞佛入涅槃各各懷悲惱佛滅一何速
聖王法之王安慰無量衆我若滅度時汝等勿憂怖
是德藏菩薩於無漏實相心已得通達其次當作佛
號曰爲淨身亦度無量衆佛此夜滅度如薪盡火滅
分布諸舍利而起無量塔比丘比丘尼其數如恒沙
倍復加精進以求無上道是妙光法師奉持佛法藏

八十小劫中廣宣法華經是諸八王子妙光所開化堅固無上道當見無數佛供養諸佛已隨順行大道相繼得成佛轉次而授記最後天中天號曰燄燈佛諸仙之導師度脫無量衆是妙光法師時有一弟子心常懷懈怠貪著於名利求名利無厭多遊族姓家棄捨所習誦廢忘不通利以是因緣故號之爲求名亦行衆善業得見無數佛供養於諸佛隨順行大道具六波羅蜜今見釋師子其後當作佛號名曰彌勒廣度諸衆生其數無有量彼佛滅度後懈怠者汝是妙光法師者今則我身是

論曰問八識何以能轉而爲四智乎曰以無性故

能轉也如其有性則是凝然不可更易之物聖應自聖凡應自凡從古至今無一人發菩提心者一切衆生流轉三界無有止息者不知無性之妙故楞伽經曰前聖所知轉相傳授妄想無性又問何以能知汙染意識轉爲平等性智乎曰經旨深妙微見其端曰妙光菩薩持妙法蓮華經而入王子皆師事之汙染意識者住持三世之法起信論曰以念相應不斷故住持過去無量世等善惡之業今不失故復能成熟現在未來苦樂等報無差違故能今現在已經之事忽然而念未來之事不覺妄慮故此意識具如是堪能於轉依時但是轉其

名耳以其能持經而光無憎愛故知其爲平等性
智也又問五識何以能知是求名菩薩爲觸識乎
曰身者見聞覺知所依止處而經言求名利無厭
多遊族姓家愛著深故無厭惑妙麗故多遊眼耳
鼻舌皆利而明了唯觸一法鈍故經言棄捨所習
誦廢忘不通利也又問何以能知妙觀察智爲文
殊師利乎曰分別事識與意識皆因中轉亦但轉
其名蓋分別而不起法相不起非法相耳文殊師
利亦號妙德思益經曰雖說諸法而不起法相不
起非法相故名妙德

我見燈明佛本光瑞如此以是知今佛欲說法華經

今相如本瑞是諸佛方便今佛放光明助發實相義
諸人今當知合掌一心待佛當雨法雨充足求道者
諸求三乘人若有疑悔者佛當爲除斷今盡無有餘
無盡居士論曰釋迦文佛既成道已釋梵諸天請
轉法輪佛觀諸衆生根器狹劣得少爲足默而不
說則違我度人之本願說而不信則重彼謗法之
罪報隨宜方便演說三乘有餘涅槃非真滅度四
十餘年教化純熟乃於耆闍崛山集阿羅漢有學
無學菩薩摩訶薩天龍聖衆放眉間中道白毫相
光照見東方萬八千世界說妙法蓮華經者諸法
之相從本以來常自寂滅不可以言宣者也妙者

至妙而難思者也唯佛與佛乃能究盡猶如優曇鉢華時一現爾優曇鉢華瑞蓮華也此華難有如佛難值所謂妙法蓮華經者非如諸經蓮華或取其開敷出水或取其因果同時也眉間相光中道之光也表佛出現照東方者東者日之始且物之始生以表此會始說佛乘也萬八千世界者一十八界歷劫修行至此而佛光始現故以東方表之也比丘萬二千人有學無學二千人摩訶波闍波提比丘尼與眷屬六千人大菩薩八萬人或二萬或二千或六千或八萬者以表二乘十二因緣六通八解脫也不標上首者所謂我此會中純是真

實無復枝葉猶日月燈明二萬佛同一字一姓也佛光所照靡不周徧惟得道者見之六趣衆生現於光中而不自知也此經會三乘歸一乘弥勒後佛也文殊佛之師也故以二人爲起疑問答之主舍利弗受記以開其始普賢勸發以成其終文殊宣說過去日月燈明佛說妙法蓮華經時放光現瑞與今無異斯則前佛後佛無異法也佛爲衆生之父八王子聞父出家隨修梵行則八意識轉而爲清白梵行矣滿六十小劫不起此座則滿足六波羅蜜不離當處此經謂之旋陀羅尼法音方便陀羅尼旋者旋轉互攝而歸一也方便者得意忘

言不滯於名相筭數之迹也得此二陀羅尼則法
華三昧昭然現前矣

妙法蓮華經方便品第二

爾時世尊從三昧安詳而起告舍利弗諸佛智慧甚
深無量其智慧門難解難入一切聲聞辟支佛所不
能知

論曰佛以諸佛智慧不可思議以妙方便示白毫
之相光入無量義處三昧使諸學者自求而得之
謂之智慧門然此爲一佛乘境界三乘種性其能
入之哉維摩詰聞東方度三十六恒河沙國有世
界號須弥相其佛號須弥燈王彼佛長八萬四千

由旬其師子座高八萬四千由旬嚴飾第一於是
維摩詰現神通力卽時彼佛遣三萬二千師子座
高廣嚴淨來入維摩詰室諸菩薩大弟子釋梵等
昔所未見舍利弗曰未曾有也如是小室乃能容
受此高廣之座於毗耶室無所妨礙此舍利弗佇
思其間自成妨礙非毗耶離室之罪也善財童子
至弥勒樓閣之前以弥勒菩薩威力故及不思
議幻智力故能以幻智知諸法故得諸菩薩自在
力故見樓閣中一切莊嚴自在境界尔時弥勒菩
薩摩訶薩卽攝神力入樓閣中彈指作聲告善財
言善男子起法性如是此是菩薩知諸法智因緣

聚所現之相如是自性如幻如夢如影如像悉不成就尔時善財聞彈指聲從三昧起見種種境界此善財於彈指頃自覺成就非弥勒閣之功也由是論之則諸佛智慧之門所以難解難入固非聲聞辟支佛所能知也

所以者何佛曾親近百千萬億無數諸佛盡行諸佛無量道法勇猛精進名稱普聞成就甚深未曾有法隨宜所說意趣難解舍利弗吾從成佛已來種種因緣種種譬喻廣演言教無數方便引導眾生令離諸著

論曰佛以一切衆生覺性無性故不能自知無性

名曰無明若知無性無明卽滅慧身成就雖曰不由他悟然亦必藉善知識爲緣故佛將說法首言親近百千萬億無數諸佛雖有禪定觀照則是親近方便雖有六度萬行則是長養成就皆所以隨順之非修證也故又曰盡行諸佛無量道法勇猛精進初於鹿野苑爲小根者說小乘明心境俱有次爲中根說法相大乘明境空心有唯識道理以根劣故未能全入平等真空故作是說後乃爲上根說無相大乘辨心境俱空平等一味爲真了義如人劈木先用細楔後用麤楔故又曰隨宜所說意趣難解也

所以者何如來方便知見波羅蜜皆已具足舍利弗
如來知見廣大深遠無量無礙力無所畏禪定解脫
三昧深入無際成就一切未曾有法舍利弗如來能
種種分別巧說諸法言辭柔軟悅可衆心舍利弗取
要言之無量無邊未曾有法佛悉成就

論曰經言所以者何疊前段經意之辭也經意有
三種所謂如來方便知見波羅蜜者卽隨宜所說
意趣難解是也所謂如來知見廣大深遠無量無
礙者卽放毫相之光現凡聖之土是也所謂力無
所畏禪定解脫三昧深入無際者卽入無量義處
三昧身心不動是也一切未曾有法以是三種所

以成就豈特三種雖無量無邊皆悉成就故曰舍
利弗取要言之取要者槩舉之辭也

止舍利弗不須復說所以者何佛所成就第一希有
難解之法唯佛與佛乃能究盡諸法實相所謂諸法
如是相如是性如是體如是力如是作如是因如是
緣如是果如是報如是本末究竟等

論曰佛知時至當說而曰止不須復說者語枉意
直激之以奮發之辭不奮不發則不能以深觀諸
法實相也諸法實相而曰如是相者生而無生之
相也生而無生則無以名之但曰如是而已然相
言如是可也又申之曰其性體力作因緣果報皆

名如是何也曰此九種義起必同時於一刹那無
有先後所以結其辭曰本末究竟等等之爲言齊
也楞伽經曰一切法不生我說刹那義當生卽有
滅不爲愚者說以其偈觀九義若合符契一切法
不生則如是性如是體也我說刹那義則如是相
如是力如是作也問曰三義同一刹那有據乎曰
瑜伽論曰唯有因法有諸行皆刹那住尚無况用
卽說彼生起爲用爲作者之用力也夫一刹那生
起之相用與作便具則三義同一刹那明矣當生
卽有滅則如是因如是緣如是果如是報也唯其
當生而滅則本末等之謂也不爲愚者說則第一

希有之法唯佛與佛乃能究盡故其下文之偈曰
世雄不可量言世雄者正以三乘之衆及天人等
皆雌伏故也隋僧智顓以九義爲十如唐僧窺基
又以爲五句盖不足怪也

爾時世尊欲重宣此義而說偈言

世雄不可量諸天及世人一切衆生類無能知佛者
佛力無所畏解脫諸三昧及佛諸餘法無能測量者
本從無數佛具足行諸道甚深微妙法難見難可了
於無量億劫行此諸道已道場得成果我已悉知見
如是大果報種種性相義我及十方佛乃能知是事
是法不可示言辭相寂滅諸餘衆生類無有能得解

除諸菩薩衆信力堅固者

論曰經前文言諸法實相所謂諸法如是相如是性如是體如是力如是作如是因如是緣如是果如是報如是本末究竟九種義一寂滅耳故偈曰是法不可示言辭相寂滅意義粲然無可疑者而舊疏輒曰相如水火之相異故易知性如火以熱爲性水以濕爲性體則以主質爲義如十法界陰入俱用色心爲體力則以堪任爲義心亦具有如來十力作則以運爲建立爲義若離心者更無所作因則以招果爲因緣則以緣由助業果則以克獲爲果報則以酬因爲報相以爲本報以爲末

入緣生緣生故空則空等也相但有字報亦但有字悉假施設假等也又相卽無相無相而相非相非無相報亦然一一皆入如實之際則中等也經示諸法之相如是皆本末等者以法當生卽有滅如前段所論詳矣文字之師乃撰造其辭入空假中三觀之中譬如夷狄入華夏假華夏之語以遮夷狄之形自以爲至矣而華人聞其謦咳則掩口而笑也

諸佛弟子衆曾供養諸佛一切漏已盡住是最後身如是諸人等其力所不堪假使滿世間皆如舍利弗盡思共度量不能測佛智正使滿十方皆如舍利弗

及餘諸弟子亦滿十方刹盡思共度量亦復不能知
辟支佛刹智無漏最後身亦滿十方界其數如竹林
斯等共一心於億無量劫欲思佛實智莫能知少分
新發意菩薩供養無數佛了達諸義趣又能善說法
如稻麻竹葦充滿十方刹一心以妙智於恒河沙劫
咸皆共思量不能知佛智不退諸菩薩其數如恒沙
一心共思求亦復不能知又告舍利弗無漏不思議
甚深微妙法我今已具得唯我知是相十方佛亦然
論曰聲聞辟支佛多於稻麻竹葦矣而又滿十方
刹者廣也億無量劫者久也盡其思慮以度佛智
終莫能得非特然也諸新發意及不退菩薩多於

恒河沙矣而又滿十方刹者廣也恒河沙劫者久
也盡其思慮以度佛智亦莫能得是何也曰佛之
智境出於形數之表蓋思慮所及皆形數也思於
文從自從心說文曰造形上極思之又思之乃至
於無思如凶上達土氣然也所以童子之謠筮瓦
之卜其神驗如影赴形者出於無思無理故也華
嚴論曰如來第三會於須弥山頂說十住者以明
入理契智非生滅心所得至故如此山在海中高
八萬四千由旬非手足攀攬所及明八萬四千塵
勞山在煩惱大海於一切法無思無爲卽煩惱海
枯竭塵勞山成一切智山煩惱海成一切性海若

起心思慮有所攀緣則無明山愈高煩惱海愈深
不可至其智頂也

舍利弗當知諸佛語無異於佛所說法當生大信力
世尊法久後要當說真實告諸聲聞衆及求緣覺乘
我今脫苦縛逮得涅槃者佛以方便力示以三乘教
衆生處處著引之令得出

論曰金剛般若經曰須菩提白佛言世尊頗有衆
生得聞如是言說章句生實信不佛告須菩提莫
作是說如來滅後後五百歲有持戒修福者於此
章句能生信心以此爲實當知是人不少於一佛二
佛三四五佛而種善根已於無量千萬佛所種諸

善根聞是章句乃至一念生淨信者自是而言則
信力之生非一朝一夕蓋久積淨業曠劫修持所
致也舍利弗始從外道沙然學學成而去道逢頽
顛比丘愛其威儀問曰汝師爲誰耶頽顛曰諸法
從緣生是故說因緣是法緣及盡我師如是說舍
利弗一聞而悟曰世尊有大智慧我亦當師事之
唐僧元曉自東海來欲傳習華嚴大教夜宿塚間
渴甚引手掬于坐旁得水甘涼明日見之髑髏也
欲嘔而悟曰心生則種種法生心滅則髑髏不二
經言三界惟心世尊豈欺我哉舍利弗聞偈而信
元曉遇緣而信則經誠令於佛所說法當生大信

力是爲判語也

爾時大衆中有諸聲聞漏盡阿羅漢阿若憍陳如等千二百人及發聲聞辟支佛心比丘比丘尼優婆塞優婆夷各作是念今者世尊何故殷勤稱歎方便而作是言佛所得法甚深難解有所言說意趣難知一切聲聞辟支佛所不能及佛說一解脫義我等亦得此法到於涅槃而今不知是義所趣

論曰經言我等亦得此法到於涅槃者如黃金黑金名同而精粗則異佛所證者自性清淨涅槃一切有情平等共有與一切法不一不異離一切相一切分別尋思路絕名言道斷唯真聖者自內所

證黃金也聲聞則身心語言皆悉斷滅終不能至彼之親證所現涅槃涅槃而言所現則非自性清淨涅槃黑金也世有以黑金爲黃金非生盲則失心者但離虛妄名爲解脫而已而舍利弗便以爲一切解脫是黃金黑金之說也

爾時舍利弗知四衆心疑自亦未了而白佛言世尊何因何緣殷勤稱歎諸佛第一方便甚深微妙難解之法我自昔來未曾從佛聞如是說今者四衆咸皆有疑惟願世尊敷演斯事世尊何故殷勤稱歎甚深微妙難解之法尔時舍利弗欲重宣此義而說偈言
慧日大聖尊久乃說是法自說得如是力無畏三昧

禪定解脫等不可思議法道場所得法無能發問者
我意難可測亦無能問者無問而自說稱歎所行道
智慧甚微妙諸佛之所得無漏諸羅漢及求涅槃者
今皆墮疑網佛何故說是其求緣覺者比丘比丘尼
諸天龍鬼神及乾闥婆等相視懷猶豫瞻仰兩足尊
是事爲云何願佛爲解說於諸聲聞衆佛說我第一
我今自於智疑惑不能了爲是究竟法爲是所行道
佛口所生子合掌瞻仰待願出微妙音時爲如實說
諸天龍神等其數如恒沙求佛諸菩薩大數有八萬
又諸萬億國轉輪聖王至合掌以敬心欲聞具足道
爾時佛告舍利弗止止不須復說若說是事一切世

間諸天及人皆當驚疑舍利弗重白佛言世尊惟願
說之惟願說之所以者何是會無數百千萬億阿僧
祇衆生曾見諸佛諸根猛利智慧明了聞佛所說則
能敬信爾時舍利弗欲重宣此義而說偈言

法王無上尊惟說願勿慮是會無量衆有能敬信者
佛復止舍利弗若說是事一切世間天人阿脩羅皆
當驚疑增上慢比丘將墜於大坑爾時世尊重說偈
言

止止不須說我法妙難思諸增上慢者聞必不敬信
爾時舍利弗重白佛言世尊惟願說之惟願說之今
此會中如我等比百千萬億世世已曾從佛受化如

此入等必能敬信長夜安隱多所饒益尔時舍利弗
欲重宣此義而說偈言

無上兩足尊願說第一法我爲佛長子惟垂分別說
是會無量衆能敬信此法佛已曾世世教化如是等
皆一心合掌欲聽受佛語我等千二百及餘求佛者
願爲此衆故惟垂分別說是等聞此法則生大歡喜
論曰佛聞舍利弗勤請之語初止之曰若說是事
一切世間諸天及人皆當驚疑次請而止之曰若
說是事一切世間天人阿脩羅羅皆當驚疑此會百
千萬億之衆但言天人阿脩羅羅聞必驚疑何也曰
天人根利受法情深殊勝之境微妙之音乃其見

聞之習不復生疑阿脩羅羅根鈍得預法會被佛威
神之力由昔熏蒸之善然方瞋故不暇生疑今天
人阿脩羅羅皆驚疑則事之殊異非其所聞之習也
信敬如天人如阿脩羅羅衆則驚疑矣不信敬如增
上慢者則必墜惡道以此故佛未欲遽說也

爾時世尊告舍利弗汝已殷勤三請豈得不說汝今
諦聽善思念之吾當爲汝分別解說說此語時會中
有比丘比丘尼優婆塞優婆夷五千人等卽從座起
禮佛而退所以者何此輩罪根深重及增上慢未得
謂得未證謂證有如此失是以不佳世尊默然而不
制止尔時佛告舍利弗我今此衆無復枝葉純有貞

實舍利弗如是增上慢人退亦佳矣汝今善聽當爲
汝說舍利弗言唯然世尊願樂欲聞

論曰耆闍崛山預法會者無慮百千萬衆推之人
情莫不欽奉慈嚴欣聞明誨不信是五千人自甘
刪去經必有意耶曰涅槃經曰譬如有人以雜毒
藥用塗大鼓於衆人中擊之發聲雖無心欲聞聞
之皆死唯除一人不橫死者是大乘典大涅槃經
亦復如是在在處處諸行衆中有聞之者貪欲瞋
恚愚癡悉皆滅盡其中雖有無心無念是大涅槃
經因緣力故能滅煩惱而自結滅犯四重禁及五
無間聞是經已亦作無上菩提因緣漸斷煩惱除

不橫死一闡提也推涅槃經之意以知此經之旨
龍女獻珠之頃忽然變成男子具菩薩行卽往南
方無垢世界坐寶蓮華成等正覺者無心欲聞聞
之皆死者也而是五千人自甘刪去者不橫死一
闡提者也至於授舍利弗大弟子五百阿羅漢學
無學人成佛之記者卽是涅槃經曰是涅槃經已
作無上菩提因緣漸斷煩惱如聞鼓聲而久乃死
者也然佛爲世間大慈悲父等視衆生猶如一子
豈於五千人獨不憐愍之乎華嚴經曰金翅鳥王
以龍爲食先觀大海諸龍命將盡者卽以兩翅劈
海取而食之彼五千人者又如命未盡之龍而佛

則如金翅鳥王其不取之固其所也

佛告舍利弗如是妙法諸佛如來時乃說之如優曇鉢華時一現耳

論曰十方三世微塵數佛以無礙辯才於此經不能增一字以無量三昧於此經不能增一毫蓋辯才無所施其巧三昧無所施其力巧力絕矣而名如是妙法者如夜半正明天曉不露也譬如射者射至百步力也射中百步巧也至於箭鋒相直則非巧力所能及也維摩詰問三十二菩薩談不二法門竟於是文殊師利問維摩詰曰我等各自說已仁者當說何等是菩薩入不二法門時維摩詰

默然無言而文殊師利歎以爲是真入不二法門龍勝菩薩聞迦那提婆來過將及門遣侍者以滿鉢水置座前提婆既見以針投之於是龍勝所然付以祖位夫文殊師利之歎維摩詰迦那提婆之契龍勝菩薩箭鋒相直也豈有法可傳哉優曇鉢此言瑞應三千歲乃華華必金輪王應世佛以况第一希有之法故經言諸佛如來時乃說之也

舍利弗汝等當信佛之所說言不虛妄舍利弗諸佛隨宜說法意趣難解所以者何我以無數方便種種因緣譬喻言辭演說諸法是法非思量分別之所能解唯有諸佛乃能知之

論曰佛意若曰我種種譬喻而說者但能說諸法耳至於適今所示如是妙法者則無有譬喻言辭可形容之也華嚴經曰佛子如來以一切譬喻說種種事無有譬喻能喻此法何以故心智路絕不思議故譬如太末蟲處處能集唯不能集於火聚之上衆生意識處處能緣唯不能緣般若何以故般若如大火則爲所燒故故經言唯有諸佛乃能知之耳

所以者何諸佛世尊唯以一大事因緣故出現於世舍利弗云何名諸佛世尊唯以一大事因緣故出現於世諸佛世尊欲令衆生開佛知見使得清淨故出現於世欲示衆生佛之知見故出現於世欲令衆生悟佛知見故出現於世欲令衆生入佛知見道故出現於世舍利弗是爲諸佛以一大事因緣故出現於世佛告舍利弗諸佛如來但教化菩薩諸有所作常爲一事唯以佛之知見示悟衆生舍利弗如來但以一佛乘故爲衆生說法無有餘乘若二若三舍利弗一切十方諸佛法亦如是

論曰聲聞辟支佛之望登地菩薩其遠如天淵况以凡夫衆生而望佛地乎而經乃言衆生開佛知見茲爲難信也然佛不言以佛知見授之衆生而言欲令衆生開佛知見示佛知見悟佛知見入佛

知見者則知衆生本自有之不從他以得之也雖
不從他以得之必藉善知識爲之緣以方便爲開
示而使之悟入也如世良醫之治目病者目以翳
故無所見哀求目明良醫笑曰我能去翳耳翳除
則明自現非有明持以相與也明如可與還應是
翳以是觀之則佛於佛之知見一大事因緣但曰
開示使之悟入者法如是故然此非佛自智故言
十方諸佛法亦如是言十方則自具三世故下文
又叙三世

舍利弗過去諸佛以無量無數方便種種因緣譬喻
言辭而爲衆生演說諸法是法皆爲一佛乘故是諸
衆生從諸佛聞法究竟皆得一切種智舍利弗未來
諸佛當出於世亦以無量無數方便種種因緣譬喻
言辭而爲衆生演說諸法是法皆爲一佛乘故是諸
衆生從佛聞法究竟皆得一切種智舍利弗現在十
方無量百千萬億佛土中諸佛世尊多所饒益安樂
衆生是諸佛亦以無量無數方便種種因緣譬喻言
辭而爲衆生演說諸法是法皆爲一佛乘故是諸衆
生從佛聞法究竟皆得一切種智舍利弗是諸佛但
教化菩薩欲以佛之知見示衆生故欲以佛之知見
悟衆生故欲令衆生入佛之知見故舍利弗我今亦
復如是知諸衆生有種種欲深心所著隨其本性以

種種因緣譬喻言辭方便力而爲說法舍利弗如此
皆爲得一佛乘一切種智故舍利弗十方世界中尚
無二乘何況有三

論曰文起前義示過去未來現在諸佛皆言以無
量無數方便種種因緣譬喻言辭者必說三乘法
也所以說三乘法者引令趣一佛乘故因一佛乘
以得一切種智則一佛乘者因也一切種智者果
也故三世聞法之衆皆言從諸佛聞法究竟皆得
一切種智三世之凡聖頓漸之權實與夫一佛乘
之因果既已詳具之矣乃明告以所以謂之一佛
乘者欲示佛之知見令一切衆生悟入之耳夫佛

之知見不存三世情見凡聖權實之號故終則不
言皆爲一佛乘便言皆爲得一佛乘一切種智故
一佛乘一切種智同時言得則因果一念也楞伽
經曰如世尊所說我從某夜得最正覺乃至某夜
入般涅槃於其中間不說一字亦不已說當說今
說是佛說以此而觀雖一佛乘亦爲剩法也

舍利弗諸佛出於五濁惡世所謂劫濁煩惱濁衆生
濁見濁命濁如是舍利弗劫濁亂時衆生垢重慳貪
嫉妒成就諸不善根故諸佛以方便力於一佛乘分
別說三

論曰鳩摩羅什曰梵本多歲數名多由泓多由泓

者大劫也如賢劫比大劫中有小劫名諸過惡摠
名劫濁也善良既盡純惡種類名衆生濁也諸貪
瞋癡等煩惱增長爲增上緣重者能障道入惡趣
名煩惱濁也於煩惱中起邪見謗無因果罪福涅
槃名見濁也大劫初時人壽無量自後漸短乃至
一百二十歲及以下者名命濁也佛意若曰我於
是時知一佛乘之法微妙不可以驟語之故以方
便力於一佛乘分別說三非真實也

舍利弗若我弟子自謂阿羅漢辟支佛者不聞不知
諸佛如來但教化菩薩事此非佛弟子非阿羅漢非
辟支佛又舍利弗是諸比丘比丘尼自謂已得阿羅

漢是最後身究竟涅槃便不復志求阿耨多羅三藐
三菩提當知此輩皆是增上慢人所以者何若有比
丘實得阿羅漢若不信此法無有是處除佛滅度後
現前無佛所以者何佛滅度後如是等經受持讀誦
解義者是人難得若遇餘佛於此法中便得決了舍
利弗汝等當一心信解受持佛語諸佛如來言無虛
妄無有餘乘唯一佛乘

論曰此一佛乘如來知見唯佛與佛乃能究盡若
二乘阿羅漢辟支佛之知見則不能知也盖二乘
所見狹小故經言自謂已得究竟涅槃不復志求
佛乘此則謂之增上慢人又言若有比丘實得阿

羅漢而不信此法是二者皆過矣佛所以誠學者
毋於二乘尋求但於佛乘生信故丁寧之曰除佛
滅後現前無佛則但受持讀誦此經而已受持讀
誦滋茂封殖譬也若遇有佛出世則以所嘗滋茂
封殖者求決了之便當卽獲本悟也故經言若遇
餘佛於此法中便得決了圓覺經曰衆生有妄業
故妄見流轉厭流轉者妄見涅槃是故不能入清
淨覺非覺遠拒諸能入者有諸能入非覺入故非
覺入故猶言非入覺故非覺遠拒諸能入者則經
言於教化菩薩事不聞不知者類也有諸能入非
覺入故者則經言實得阿羅漢而不信此法者類

也易曰仁者見之謂之仁智者見之謂之智百姓
日用而不知故君子之道鮮矣

爾時世尊欲重宣此義而說偈言

比丘比丘尼有懷增上慢優婆塞我慢優婆夷不信
如是四衆等其數有五千不自見其過於戒有缺漏
護惜其瑕疵是小智已出衆中之糟糠佛威德故去
斯人豈福德不堪受是法此衆無枝葉唯有諸貞實
舍利弗善聽諸佛所得法無量方便力而爲衆生說
衆生心所念種種所行道若干諸欲性先世善惡業
佛悉知是已以諸緣譬喻言辭方便力令一切歡喜
或說脩多羅伽陀及本事本生未曾有亦說於因緣

譬喻并祇夜優波提舍經

論曰脩多羅此言法本亦言契經摩訶衍及四阿舍二百五十戒直說者是也伽陀此言不重頌一切四言五言七言九言等偈不重頌者是也祇夜此言重頌義與伽陀同但重頌不重頌爲異耳優波提舍此言論議謂答諸問者并廣說諸義者是也并本事本生未曾有因緣譬喻爲九部然本十二部而次第則一脩多羅二祇夜三記莈四諷誦卽伽陀也五自說六緣起七譬喻八本事九本生十方廣十一希法卽未曾有也十二優波提舍鈍根樂小法貪著於生死於諸無量佛不行深妙道

衆苦所惱亂爲是說涅槃我設是方便令得入佛慧未曾說汝等當得成佛道所以未曾說說時未至故今正是其時決定說大乘我此九部法隨順衆生說入大乘爲本以故說是經有佛子心淨柔軟亦利根無量諸佛所而行深妙道爲此諸佛子說是大乘經我記如是人來世成佛道以深心念佛修持淨戒故此等聞得佛大喜充徧身佛知彼心行故爲說大乘聲聞若菩薩聞我所說法乃至於一偈皆成佛無疑論曰如三乘知見則佛道之成必歷三大阿僧祇劫盡行種種苦行始從凡夫而入信位自十信以入十住自十住以入十行自十行以登十回向然

未及十地猶是地前假名菩薩其去等覺妙覺之位尚遼邈而此經乃言聲聞若菩薩聞我所說法乃至於一偈皆成佛無疑則知一佛乘知見決非地位修行所能管攝佛初以非其時故未說今其時矣則敢明告之也迦陵仙禽方出殼時鳴聲超越已勝群鳥堅好之樹初出土時高特敷茂已勝衆木華嚴經曰譬如王子生於王家王后所生具足王相生已卽勝一切臣衆

十方佛土中唯有一乘法無二亦無三除佛方便說但以假名字引導於衆生說佛智慧故諸佛出於世唯此一事實餘二則非真終不以小乘濟度於衆生

佛自住大乘如其所得法定慧力莊嚴以此度衆生自證無上道大乘平等法若以小乘化乃至於一人我則墮慳貪此事爲不可若人信歸佛如來不欺誑亦無貪嫉意斷諸法中惡故佛於十方而獨無所畏我以相嚴身光明照世間無量衆所尊爲說實相印舍利弗當知我本立誓願欲令一切衆如我等無異如我昔所願今者已滿足化一切衆生皆令入佛道若我遇衆生盡教以佛道無智者錯亂迷惑不受教我知此衆生未曾修善本堅著於五欲癡愛故生惱以諸欲因緣墜墮三惡道輪迴六趣中備受諸苦毒受胎之微形世世常增長薄德少福人衆苦所逼迫

入邪見稠林若有若無等依止此諸見具足六十二
深著虛妄法堅受不可捨我憍自矜高諂曲心不實
於千萬億劫不聞佛名字亦不聞正法如是人難度
論曰以諸欲因緣乃至如是人難度重叙衆生濁
命濁見濁煩惱濁劫濁也然是五濁寔本一念以
迷妄故境界則形經叙劫濁於先以示器界偈叙
衆生濁於先以示根身根身之增長如唯識論曰
第八識一念受生時有執取結生相續義結者繫
也於母胎中一念繫之方父母愛滌之極自識攬
其流液如磁石吸鐵一刹那而住根塵等種從自
識中亦生現行名爲執取結生故在胎則五位具

一七日名雜穢狀如薄酪二七日名醎猶如豌豆
瘡醎之形表裏如酪未生肉故三七日名凝結形
如就了之血四七日名凝厚漸成堅硬內風所吹
生諸根相一身四肢生差別故於此三十五日盡
其五根皆足是謂五位具也於六七日則髮毛爪
齒七七日則諸根皆具以五根圓滿次生識然未
具空明緣也受胎之微形世世常增長如此至於
以有爲常見以無爲斷見因此二見於色中計我
謂色卽我離色非我色大我小我在色中我大色
小色在我內五陰以前四種見計爲二十二之
數加三世計爲六十并根本二見成六十二入邪

見稠林又如此

是故舍利弗我爲設方便說諸盡苦道示之以涅槃
我雖說涅槃是亦非真滅諸法從本來常自寂滅相
佛子行道已來世得作佛我有方便力開示三乘法
一切諸世尊皆說一乘道今此諸大衆皆應除疑惑
諸佛語無異唯一無二乘過去無數劫無量滅度佛
百千萬億種其數不可量如是諸世尊種種緣譬喻
無數方便力演說諸法相是諸世尊等皆說一乘法
化無量衆生令入於佛道

論曰如前所示衆生濁命濁者卽是苦見濁煩惱
濁劫濁者卽是苦集說諸盡苦道卽是滅道示之

以涅槃卽是滅然此特以假名字引導衆生今入
佛道而已故言是亦非真滅真滅者當觀諸法從
本來常自寂滅相不言寂滅性者經有微旨大乘
論曰諸法體相世間現見云何言無耶曰凡夫妄
見此非可信生滅之法皆悉是空猶如燈焰念念
生滅凡夫愚人謂爲一燄涅槃經曰如燈雖念念
滅而有光除破暗冥念等諸法亦復如是夫自燈
一法而觀則但自燈明法本無暗明暗俱空無作
無取明若有作不應容暗暗若有取不應容明豈
持燈體相如此法法皆然故首楞嚴經曰諦觀法
法何狀

又諸大聖主知一切世間天人群生類深心之所欲
更以異方便助顯第一義若有衆生類值諸過去佛
若聞法布施或持戒忍辱精進禪智等種種修福慧
如是諸人等皆已成佛道諸佛滅度後若人善軟心
如是諸衆生皆已成佛道諸佛滅度已供養舍利者
起萬億種塔金銀及玻黎碑磔與瑪瑙玫瑰瑠璃珠
清淨廣嚴飾莊校於諸塔或有起石廟栴檀及沈水
木椽并餘材甄瓦泥土等若於曠野中積土成佛廟
乃至童子戲聚沙爲佛塔如是諸人等皆已成佛道
若人爲佛故建立諸形像刻雕成衆相皆已成佛道
或以七寶成鍮石赤白銅白鐵及鉛錫鐵木及與泥

或以膠漆布嚴飾作佛像如是諸人等皆已成佛道
彩畫作佛像百福莊嚴相自作若使人皆已成佛道
乃至童子戲若草木及筆或以指爪甲而畫作佛像
如是諸人等漸漸積功德具足大悲心皆已成佛道
但化諸菩薩度脫無量衆人於塔廟寶像及畫像
以華香幡蓋敬心而供養若使人作樂擊鼓吹角貝
簫笛琴箏篴琵琶鏡銅鈸如是衆妙音盡持以供養
或以歡喜心歌唄頌佛德乃至一小音皆已成佛道
若人散亂心乃至以一華供養於畫像漸見無數佛
或有人禮拜或復但合掌乃至舉一手或復小低頭
以此供養像漸見無量佛自成無上道廣度無數衆

入無餘涅槃如薪盡火滅若人散亂心入於塔廟中
一稱南無佛皆已成佛道於諸過去佛在世或滅後
若有聞是法皆已成佛道未來諸世尊其數無有量
是諸如來等亦方便說法一切諸如來以無量方便
度脫諸衆生入佛無漏智若有聞法者無一不成佛
諸佛本誓願我所行佛道普欲令衆生亦同得此道
未來世諸佛雖說百千億無數諸法門其實爲一乘
論曰春在萬物大如山川細如毫忽繁如草木妙
如葩葉纖穠橫斜深淺背向雖不一而其明秀艷
麗之色隨物具足無有間限一切衆生本來成佛
乏妙見於日用亦復如是欲令衆生自證此妙則

必於因緣時節之中故佛於世間出世間之法名
標件數使之成就六波羅蜜者出世間之法也如
是諸法舉必全真無非佛者故經每言皆已成佛
今偈自若有衆生類至皆已成佛道叙六波羅蜜
也又自諸佛滅度已至皆已成佛道叙塔廟也然
聚沙之戲不如曠野積土曠野積土不如石香木
殖石香木殖不如寶飾萬億雖麤妙不等而成佛
等也又自若人爲佛故至皆已成佛道叙佛像也
然戲畫易於彩畫彩畫易於塑像塑像易於鑄像
鑄像易於雕像而以爪甲之戲至於雕鏤寶飾增
積其功亦成佛道雖真戲不等而成佛則等也又

自若人於塔廟至皆已成佛道叙聲音也然一稱
南無輕於一舉手一舉手輕於小低頭小低頭輕
於合掌合掌輕於禮拜散華一華微於一音一音
微於歌唄歌唄微於衆妙音衆妙音微於衆妙供
雖勤怠不等而成佛則等也又自於諸過去佛至
其實爲一乘結其辭以三世諸佛莫不皆以是異
方便助發之然法無生滅則生與滅等證知三世
同時也

諸佛兩足尊知法常無性佛種從緣起是故說一乘
是法住法位世間相常住於道場知已導師方便說
天人所供養

論曰般若燈論曰若諸緣起彼無起彼起自體不
可得若緣自在說彼空解空名爲不放逸若人知
無一物起亦復知無一物滅彼非有故亦非無見
彼世間悉空寂本來寂靜無諸起自性如是已涅
槃然則何以知其然乎曰以緣起無性故知之夫
塵爲心緣心爲塵因因緣和合幻相方生由從緣
生必無自性此一佛乘知見也成佛以是爲種故
經言佛種從緣起是故說一乘於一切法不生異
見何以故任萬用之自然故其體本真無轉變相
故起信論曰一切法常靜無有起相無明不覺妄
與法違是故不能隨順世間種種知故經言是法

住法位世間相常住卽一切法常靜無有起相也
然世之相既稱種種則非以本自性而從緣起乎
現在十方佛其數如恒沙出現於世間安隱衆生故
亦說如是法知第一寂滅以方便力故雖示種種道
其實爲佛乘知衆生諸行深心之所念過去所習業
欲性精進力及諸根利鈍以種種因緣譬喻亦言辭
隨應方便說今我亦如是安隱衆生故以種種法門
宣示於佛道我以智慧力知衆生性欲方便說諸法
皆令得歡喜舍利弗當知我以佛眼觀見六道衆生
貧窮無福慧入生死險道相續苦不斷深著於五欲
如犛牛憂尾以貪愛自蔽盲瞶無所見不求大勢佛

及與斷苦法深入諸邪見以苦欲捨苦爲是衆生故
而起大悲心

論曰衆生以愛著故往來六趣而欲又助發其性
如火方熾而沃之以油也然顛倒貪戀至失軀命
而不自知故經言如犛牛愛尾犛牛南夷之牛也
長鬣而尾佳每自愛之見人則以身自蔽遂爲所
殺佛所嗟惜貪欲成性有欲斷者先須精進大勢
佛者精進力也故經言不求大勢佛及與斷苦法
者謂不能以精進斷滅貪愛也智度論曰貪欲盖
非內非外亦非兩間何以故若內法有不應待外
出若外法有於我亦何患若兩中間有兩中間則

無處亦不從先世來何以故以一切法無來故如童子無有欲若先世有者小亦應有以是故知先世不來亦不至後世不從諸方來亦不常自有非一分中非徧身中亦不從五塵來亦不從五情出無所從生無所從滅若貪欲若先生若後有若一時生是事不然何以故若先有生後有貪欲是不應貪欲生未有貪欲故若後有生先有貪欲則生無所生若一時生則無生名生處生者生處無分別故以是觀之則貪欲本無生也知欲蓋無生則根自斷

我始坐道場觀樹亦經行於三七日中思惟如是事

我所得智慧微妙最第一衆生諸根鈍著樂癡所盲如斯之等類云何而可度爾時諸梵王及諸天帝釋護世四天王及大自在天并諸餘天衆眷屬百千萬恭敬合掌禮請我轉法輪我卽自思惟若但讚佛乘衆生沒在苦不能信是法破法不信故墜於三惡道我寧不說法疾入於涅槃尋念過去佛所行方便力我今所得道亦應說三乘作是思惟時十方佛皆現梵音慰喻我善哉釋迦文第一之導師得是無上法隨諸一切佛而用方便力我等亦皆得最妙第一法爲諸衆生類分別說三乘少智樂小法不自信作佛是故以方便分別說諸果雖復說三乘但爲教菩薩

舍利弗當知我聞聖師子深淨微妙音稱南無諸佛
復作如是念我出濁惡世如諸佛所說我亦隨順行
思惟是事已卽趣波羅柰諸法寂滅相不可以言宣
以方便力故爲五比丘說是名轉法輪便有涅槃音
及以阿羅漢法僧差別名

論曰華嚴論曰說經時分前後不同如力士經曰
佛成道一七日方說法大品經曰佛初成道卽詣
鹿野苑說法矣而不言時四分律及薩婆多論曰
六七日方說法興起經及出曜經曰七七日方說
法五分律曰八七日方說法智度論曰五七日方
說法十二遊行經曰一年不說法而唐僧法藏決

定斷佛二七日說華嚴經然此經乃曰於三七日
中思惟如是事尚憂鈍根不信謗法入惡趣欲般
涅槃因念過去諸佛曾說三乘然後隨宜而說也
如依此經則諸經爲不可信如信諸經則此經爲
不可依矣而可乎曰十定品曰如來於剎那際出
現於世入涅槃總無時也言剎那際者猶是寄言
耳以無時卽一切時出現一切時說法一切時涅
槃爲寂用無礙隨衆生心所現故則下文曰吾從
成佛已來經無量阿僧祇劫以無時可量故言無
量此爲佛說法時也以此爲定不逐世情遠思爲
無量之想經首言衆方集便說無量義教菩薩法

佛所護念已夫衆集之頃已說無量之義則以無時是說法時明矣

從久遠劫來讚示涅槃法生死苦未盡我常如是說舍利弗當知我見佛子等志求佛道者無量千萬億咸以恭敬心皆來至佛所曾從諸佛聞方便所說法我卽作是念如來所以出爲說佛慧故今正是其時舍利弗當知鈍根小智人著相憍慢者不能信是法今我喜無畏於諸菩薩中正直捨方便但說無上道菩薩聞是法疑網皆已除千二百羅漢悉亦當作佛如三世諸佛說法之儀式我今亦如是說無分別法諸佛興出世懸遠值遇難正使出于世說是法復難

無量無數劫聞是法亦難能聽是法者斯人亦復難譬如優曇華一切皆愛樂天人所希有時時乃一出聞法歡喜讚乃至發一言則爲已供養一切三世佛是人甚希有過於優曇華汝等勿有疑我爲諸法王普告諸大衆但以一乘道教化諸菩薩無聲聞弟子汝等舍利弗聲聞及菩薩當知是妙法諸佛之秘要以五濁惡世但樂著諸欲如是等衆生終不求佛道當來世惡人聞佛說一乘迷惑不信受破法墮惡道有慙愧清淨志求佛道者當爲如是等廣讚一乘道舍利弗當知諸佛法如是以萬億方便隨宜而說法其不習學者不能曉了此汝等既已知諸佛世之師

隨宜方便事無復諸疑惑心生大歡喜自知當作佛
論曰經言諸佛興出世懸遠值遇難能聽是法者
斯人亦復難三復之爲之流涕䟽此經者能聽是
經者也而反不信如經言使諸衆生悟佛知見其
辭意皎如日星輒曲說曰悟者不知義以一切聲
聞辟支佛不知彼真實處故不知真實處者不知
究竟唯一佛乘故謂如有人至親友家醉酒而卧
以無價寶珠繫之衣裏尋彼不覺後悟方知佛以
無漏智所示以如實語所演曰使諸衆生悟佛知
見而文字之師臆斷苟認曰悟者不知義特標聲
聞辟支佛爲不知真實處如人失心以白爲黑也

又經言聚沙爲佛塔乃至皆已成佛道則䟽之曰
謂發菩提心者行菩薩行者所作善根能證菩提
非諸凡夫及決定性聲聞未發菩提心者之所能
得故乃至舉手低頭等其義皆同佛方示誨時但
言如是諸衆生皆已成佛道而䟽者則枝辭蔓說
更易之審如䟽者之論則何不明告曰諸發菩提
心聚沙爲佛塔乃至小低頭皆已成佛道乎
無盡居士論曰佛入無量義處三昧從三昧安詳
而起者佛曾親近百千萬億諸佛盡行諸佛無量
道法今涅槃時至末後垂範而我弟子等誰堪於
某劫某世界成某佛正法像法各住若干劫於三

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

昧中悉知悉見如是性相如是體力如是因緣如是果報如是本末出定安詳隨宜宣示故舍利弗承文殊說言先佛現瑞之因與諸大衆渴仰敬信三請世尊惟願說之然猶會中比丘比丘尼優婆塞優婆夷五千人作禮而退此五千人猶存五蘊聞佛智慧微妙甚深難信難解望涯而返佛愍此故爲信心者方便演說導歸一乘尔四諦也十二因緣也六波羅蜜也是皆方便以爲開示悟入之門苟知吾說之爲方便則塔廟形像旛華音樂種種供養至於低頭合掌一稱佛號無不成佛如是悟如是入則佛之知見出現于世矣

妙法蓮華經合論卷第一

音釋

馨音密 密音密 分去聲 扼音厄 相去聲 覆去聲 籥


鐻同 娠音申 弁皮變切 奩而充切 昕音欣 省星上聲

數入聲 玦古穴切 焮音熏 徑廷 下勅定切 侶空早切

便平聲 榮音啓 楔音屑 凶音忽 頰惡葛切 匹米切

醜蒲兒切 曉於九切 去聲





廿

二